

*Jules Adam  
Ingénieur à Guingamp*

**PAOTRED PLO-MEUR.**

— Béz' ez oé eunn amzer all, eunn amzer dû ha kriz,  
 Ann holl dûd iaouang a roé malloz d'hô iaouankiz,  
 A rummadou d'ar Vrô-C'hall mond a réant peb bloaz,  
 Allaz! né zistroent mui da Vreiz-Izel biskoaz!

---

Nann! énep lec'h eûz a Vreiz né wéleur ô valé  
 Néméd ar ré vac'hañed, ré gôz, ha bugalé;  
 Né oa gour da labourat na da vlénia ann hel;  
 Ar gragez a éhanaz enn divez da c'hénel.

---

Napoléon oa ar roué, ar gwîr vleiz a vrézel  
 Héb truez d'ar mammou paour a strapé hô bugel;  
 Lavaret rîr er béd all éma enn eul iennad,  
 Éma béteg hé c'hénou enn eur poull leûn a wâd.

Pa oé hanvet ré Blô-meûr d'al lazérez vrâz-zé :

“ Ar bleiz zô gand ann denved, émé-z-ind-hì neûzé ! ”

“ Ia ! ann droug a zò war-n-omp ! Dougomb éta hon droug,

“ Ha d'al loen gouez ha férô astennomb hor c'houzoug, ”

D'ar béleg é léverzont : “ Sétu deiz ann ankenn,

“ Gwiskid ar stoll wenn ha dû évid hor binnigen ; — ”

“ D'hô c'herent : gwiskid iveau hô tillad kanv ha dû ; — ”

“ D'ar c'halvez : grid évid omp, grid eunn arched diouc'h-tù ! ”

Tra spountuz ! dré ar parkou hag al lann oa gwéled

Ar zoudarded iaoutank-zè ô tougen hô arched ;

Réna a réand-d'hô bész ha dira-z-hô ar c'haoun,

O kana gand ar bélek péden ann anaoun.

Meûr a zén garantéuz eûz ann holl dréviou  
 Oa deuet gant goulou-koar, arc'hloc'h hag ar c'hoaziou;  
 Daoulinet war léz ann hent eunn darn a lavaré :  
 " It, Kristénien ! Evid hoc'h pédi a raimp Doué. "

---

E kreiz lan vrâz ar Gôz-ker, war lézen ar barrez,  
 Choum a rèaz tûd ar c'haoun ; énô oé ann enkrez :  
 Enn arched é oa taoled hô bléô, hô gouriz,  
 Hag ann holl c'haoun a ganaz neûzé : DE PROFUNDIS !

---

Ann tadou a hirvoudé, allaz ! hag ar mammou  
 A strinké ô tifronka hô éné d'ann envou ;  
 Ann holl étré hô divrec'h a c'halvé hô mipien :  
 Hi, ével pa vent marô, né lavarent mui kén.

Enn eur zioulded gristen, hag hep selled adré,  
 Kuîd ézond ô tilézel hô buhez gand Doué :  
 A-héd ar wénojénou éz-éend daou-ha-daou,  
 Ken trist hag ann anaoun, tristoc'h hep lâret gaou.

---

Gand Doué é-m'int, siouaz! ha didân ann douar  
 Hô eskern a zô gwennoc'h égéed ar goulou-koar,  
 Ar gérent nec'hed iveau er héz zô diskenned :  
 Ann tadou hag ar mipien, holl a zô tréméné !

---

— Tûd iaouank, tûd glac'hared da guitaad ar vrô,  
 Ar péoc'h a zô er béd hag ar béd a zô braô,  
 Id éta a galoun vâd é-pâd hô iaouankiz!  
 C'houi a lavarô eunn deiz : gwéled em euz Paris!

Miz ébrel, 1839.

*Gret gant BRIZEUX.*

